



ALTERNATIV DEMOKRATESCH
REFORMPARTEI

Groupe parlementaire

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 13. Juli 2021

Här President,

Sou wéi d'Chambersreglement et virgesäit, bieden ech Iech, dës parlamentaresch Fro un d'Madamm Gesondheitsminister a Konsumenteschutzminister weiderzeleeden.

Duerch d'Corona-Moosname mussen Leit, déi de Fliger huelen, mat „sanitären“ Niewekäschte rechnen, déi schonn emol méi wéi 10 Prozent vum Reespräis kënnen ausmaachen. Luxairport, d'Findelsverwaltung, annonciéiert 79€ fir e Rapid Antigen Test, 119 € fir e PCR-Test an 169 € fir en Express PCR-Test. Menges Wëssens kascht e Schnelltest an der Apdikt ëm déi 5 €, mee wann ee wëll fléien, kënn een net derlaanscht, der Firma, déi um Findel Tester mécht, ronn 16 Mol dee Präis ze bezuelen. Leit, déi aus der Tierkei heemkomm sinn, schwätze vu ganz anere Präisser fir esou Tester, déi sech net mat Personal- a Materialkäschten erkläere loossen. Fir zwee Touriste kascht de séire PCR-Test am Hotel, also mat Displacement vum medezinesche Personal, 30 €. Am Verglach chiffriert dat sech um Findel op 338 € fir zwee Leit. Duerfir hätt ech dës Froe un d'Madamm Gesondheitsminister a Konsumenteschutzminister.

1. Wien ass zoustänneg fir d'Präisgestaltung bei de Covid-Tester um Findel?
2. Sinn d'Präisser vun deem Betrib, deen um Findel zoustänneg ass, transparent berechent ginn, eventuell mat enger raisonnabler Gewënnmarge, a si si vum Gesondheitsministère oder vu Luxairport ofgeseent ginn?
3. War dee Betrib dee bëllegsten Ubidder oder ass hien ouni Ausschreiwung ausgewielt ginn?
4. Wa keng Ausschreiwung war, wien huet dee Betrib no wat fir enge Krittere mat de Covid-Tester um Findel beoptraagt?
5. Handelt et sech ëm e Betrib aus dem Gesondheitsberäich a mat wéi engem Laboratoire schafft hien zesummen?
6. Gëtt et iergend eng Form vu Qualitätskontroll duerch de Gesondheitsministère, eng aner Verwaltung oder eng aner Struktur?
7. Verschidde Passagéier, déi e Fluch hu missen ofsoen an den Test nach net gemaach awer scho bezuelt haten, hu bei dem Betrib de Remboursement ugefrot, ouni awer je e Remboursement ze kréien. Kënnen déi Passagéier sech beim Konsumenteschutzministère beschwéieren?

Dee Betrib kënn jo och an de Besëtz vu perséinleche gesondheetlechen an och vu finanziellen Donnéeën vun de Passagéier.

8. Ass séchergestallt, datt déi Donnéeën geschützt sinn?

9. Ass et normal, datt e Passagéier sech bei engem him warscheinlech frieme Betrib, dee weder mam Findel nach mat der Fluchgesellschaft eppes ze dinn huet, muss registréieren, fir kënnen an de Fliger ze klammen, deen hie bezuelt huet?
10. Huet dee Betrib nach aner Aktivitéiten zu Lëtzebuerg?
11. Ass séchergestallt, datt d'registréiert User-Date vum Findel net verknäppt gi mat aneren Aktivitéite vum Fluchpassagéier bei deem Déngschtleeschter, fir e komplette Profil vum Fluchpassagéier ze erstellen?
12. Ass séchergestallt, datt d'medezinesch Informatiounen iwwert de Fluchpassagéier komplett gelöscht ginn, esou bal d'Tester net méi gültig sinn?
13. Wäre et net un der Regierung, am Sënn vum Konsumenten- an Dateschutz de Fluchpassagéier ze roden, hire Konto bei deem Betrib ze läschen esou bal si hiren negativen Testzertifikat hunn?

Mat déiwem Respekt,



Jeff Engelen
Deputéierten